



**MALO O SAMOA**

**SAUNOAGA O LE TALA  
FA'ATATAU AUTU O LE  
TUPE 2026/2027**

*“AIGA - Autasi I le Gafataulima o Atinae”*

**Afioga Mulipola Anarosa Ale-Molioo  
MINISITA O TUPE**

**26 Me 2026**

# FA'ASOLOGA O MATAUPU

I.	TAUNUUGA O LE TAMAOAIGA .....	2
II.	VAAIGA TAULAI O LE TAMAOAIGA.....	7
III.	FA'AVAE O LE TALA O LE TUPE .....	8
IV.	TA'IALA O LE TALA O LE TUPE.....	9
V.	OTOOTOGA O LE TALA O LE TUPE.....	17
VI.	FA'AVAE O TUPE MAUA.....	18
VII.	GALUEGA FA'ATINO MA ATI'INA'E O LO'O AVE IAI LE FA'AMUAMUA.....	18
VIII.	TUPE FA'AALU LĒ FUAFUAINA .....	25
IX.	TUPE ALU I ATIINA'E .....	25
X.	UPU FA'AI'U .....	27

# **SAUNOAGA O LE TALA FA'ATATAU AUTŪ O LE TUPE** **2026/2027**

O le a ou le toe taina i tua le tili pe oute toe lotoia le lautī fatulalo i ou paia ma sā Samoa aua e le mafai e se poto ona fa'aopoopo pe to'ese le atoali'o o le masina i ou mamalu, ua uma ona tosilautī ma mamanu fa'atiti. O le upu e fai i le tuāvasa, a sasi tāga a le tautai, ua 'asa le faiva, a o le upu e fai i tuāvao, a ilo tāga a le ali'iseu, ua a'e fua le seuga.

A o lā le Tusi Paia, e ui lava ina ou savali i le vanu o le ata ole oti, oute le fefe lava i se mea leaga. Aua o e fa'alagolago i le Alii, e fa'apei o le mauga o Siona i latou. E lē fa'agae'etia ae tumau e fa'avavau. E ui i le tele o lu'itau o loo feagai ma i tatou i le nei soifuaga, ae tumau pea le alofa ma le fa'amaoni o le Atua i luga o si o tatou atunuu.

## **Lau Afioga i le Fofoga Fetalai,**

E tusa ai ma le Tulafono Tumau 131, e ia te a'u le ava tele, e fai ai ma sui o le Malo, e tu'uina atu ai i luma o le laulauafono a le Palemene Mamalu, le Tala Fa'atatau Autū o le Tupe 2026/2027.

O le tatou Tala o le Tupe lenei, o lo'o atagia ai galuega ma auaunaga moomia, ina ia si'itia le atinae o le tamaoaiga, mo Samoa atoa, e aofia ai nu'u ma alalafaga uma, o aiga taitasi, ma tagatanu'u uma. Mai le fai fa'atoaga o lo'o galue aua tulaga tau fofoga taumafa, o fai pisinisi laiti o lo'o unaia atinae, o le tupulaga talavou o lo'o fai ma ave fu'a a Samoa i atunu'u i fafo - e tofu lava i latou ma lo latou sao, i le atina'e o le tatou atunu'u.

## **Lau Afioga i le Fofoga Fetalai,**

E ia te a'u le ava tele, e fa'ailoa ai i le Palemene Mamalu, o le tausaga fa'aletupe fou, o le a amatalia ai le fa'atinoga o le Ta'iala mo le Lumanai Manuia o Samoa 2026/2027 - 2030/2031. O lenei Taiala Fou o lo'o maioio ma manino ai taiala autu ua ave i ai le fa'amuamua a le Malo mo le isi lima tausaga, ma o lo'o atagia ai foi alafua e tali atu ai i lu'itau tau atina'e, o loo a'afia ai pea le tamaoaiga o le atunu'u.

Ua fa'amautu foi fua fuaga uma a le Malo, e ala atu i le Va'aiga Taula'i o lenei Taiala Fou e fa'apea,

***“O se Samoa e mauā'a lona Fa'avae i le Atua, ma lana aganu'u, e mafai ona ausia se tulaga mausalī, saogalemu ma manuia, mo ona tagatanu'u uma”***

Ma o le fatu fo'i lea o le atinaega o Samoa, o le amana'ia o o tatou tu ma aga, lo tatou fa'atuatua, ma o tatou aiga, aemaise le tiute tauave o le fetausia'i.

## **I. TAUNUUGA O LE TAMAOAIGA**

**Lau Afioga I le Fofoga Fetalai,**

A'o tapena le folauga mo le isi lima tausaga, e ao pea ona fa'ailoa nisi o taunu'uga na ausia, i le fa'atinoina o le Taiala mo le Lumanai Manuia o Samoa 2021/22 - 2025/26, lea e fa'amaea ia luni 2026. E tāua tele le vaega lea, ona o le fa'atonu folau lea o le Taiala fou, e ala i lesona tāua, e fa'amalosia ai vaega o atinae o lo'o mo'omia ona unaia.

O le a ou 'oto'otoina atu nisi o taunu'uga ma matāti'a ua ausia.

- Na fa'amauina le siitia o le tamaoaiga o le atunu'u i le 4.2 pasene i le fa'aiuga o le Tausaga Fa'aletupe 2024/25, e tusa ma le \$3.6 piliona tālā. O le 12 masina e tau mai ia Tesema 2025, na fa'amau ai le si'itia o le tamaoaiga i le 1.8 pasene, o lo'o atagia ai le gasolo lelei pea o atinae, e ui i le feagai ai ma aafiaga o le lē mautonu i atunu'u tetele o le lalolagi.
- O le fua o le tau o oloa ma auunaga o lo'o fa'atumauiina pea i lalo ifo o le tapula'a e 3 pasene, e pei ona fa'amauina ai le 1.2 pasene i le masina o Mati 2026, o se fa'aitiitiga pe a fa'atusa atu i le 1.9 pasene sa fa'amauina i le Tausaga Fa'aletupe 2024/25.
- Na fa'amauina foi le malosi o le tulaga o tupe fa'aagaga i atunuu i fafo, lea na ausia ai le \$1.6 piliona tālā i le fa'aiuga o Mati 2026, e tusa lea ma le 15.9 masina o oloa auina mai fafo.
- Mo tagata tafafao maimoa mai fafo, na fa'amauina le aofa'i e tusa ma le 209,721 i le Tausaga Fa'aletupe 2024/25, fa'apea tupe maua e tusa ma le \$652.2 miliona tālā. O le masina o Mati 2026 na

fa'amauina le aofa'i e tusa ma le 158,626, ma tupe maua e tusa ma le \$516.2 miliona tālā.

- O Tupe Fa'amomoli mai Fafo na fa'amauina le si'itia pea, e tusa ma le \$900.6 miliona tālā i le Tausaga Fa'aletupe 2024/25, ma ua fa'amauina foi le aofaiga e tusa ma le \$699.2 miliona tālā, i le iva masina muamua o le tausaga fa'aletupe lenei.
- O aitalafu a le Malo o lo'o fa'aauau pea le fa'aitiitia, e tusa ma le \$699.5 miliona tālā le tu'ufa'atasiga o aitalafau i le fa'aiuga o Mati 2026. E tusa lea ma le 19.5 pasene pe a fa'atusa i le Tamaoaiga.

### **Lau Afioga i le Fofoga Fetalai,**

A'o fa'ai'ui'u le fa'agasologa o le Taiala Muamua, e fia fa'aaoga lenei avanoa tāua, e 'oto atu ai Atinae ma Galuega Tetele na fa'atinoina, aua le ausia o Taunu'uga Autū e lima, o lo'o auiliili i lenei Taiala. Mo le silafia, i lalo o le

#### **Taiala Autū Muamua (1): Fa'aleleia le Atina'ega o le Soifuaga Lautele**

- Ua ausia fesoasoani fa'apitoa mo i latou e ma'ale'ale le soifuaga, e aofia ai le si'itia o le Penisiona mo Tagata Matutua e tusa ma le 13,000, faapea ma le Penefiti mo i latou e iai a'afiaga tumau o le soifua, e tusa ma le 2,875. I lalo o le Polokalame mo le Fausiaina o Apitaga mo Aiga Lima Vaivai, e 342 le aofa'i o aiga e ma'alea'le o latou apitaga ua oo atu i ai lea fesoasoani a le Malo
- O le masina o Fepuari 2026, na fa'atino ai le fesoasoani i aiga mo tapenaga a le fanau i le toe amatalia ai o a'oga i lenei tausaga, lea sa tufaina ai le \$150 tālā mo tagata uma, e tauala atu i Fono Fa'avae e 51, I lalo ole Polokalame mo le Atinae o Itumalo.
- Mo le Tausaga Fa'aletupe 2025/26, na si'itia i le \$12 miliona tālā, le vaegatupe fa'aagaga mo le Polokalame mo Gasegase Auina atu mo Togafitiga I Atunuu i Fafo, ina ia mautinoa ai le maua pea o avanoa mo le mamalu o le atunu'u o lo'o moomia le fesoasoani fa'apitoa fa'asoifua maloloina. Ua maea sainia maliega ma Niu Sila, Initia ma Fiti mo ia auaunaga fa'apitoa.
- O lo'o fa'aauau pea le fesoasoani a le Malo mo Aoga uma e tusa ma le \$18.5 miliona tālā, ina ia si'itia ai avanoa i tulaga tau a'oa'oga

mo alo ma fanau. O lo'o lagolagosua mai ai avanoa fa'a-sikolasipi ua maua I lalo o le Polokalame mo Atinae o Itumalo, fa'apea ma isi polokalame fa'alea'oa'oga mo isi tomai ma agava'a fa'apitoa. O ia vaega uma o lo'o 'auga i le fa'aagava'aina o tagata faigaluega uma i le atunu'u, ma o le a unaia i le fa'amaonia ai o le Fuafuaga mo le Si'itia o Tomai ma Agava'a o Tagata Faigaluega Uma 2025/26 - 2039/40.

- O isi fesoasoani mo aiga, na tu'uina atu ai le \$6 miliona tālā i le Fa'alapotopotoga mo Fale a Samoa, ina ia si'itia ai avanoa mo le fausiaina o apitaga fou mo aiga, aemaise aiga to'atele. Na fa'ailoa le maualuga o le manaoga mo lenei fesoasoani, ina ua fa'amauina ai le 74 o aiga na fa'amanuiaina talosaga mo ia nonogātupe māmā aiaiga, e tusa lea ma le \$4.46 million tālā lona aofaiga. O lo'o fa'atupulaia pea talosaga e agava'a i lea fesoasoani, ma ua atagia ai le tāua o lenei lagolago i le si'itia ai o tulaga lelei o apitaga, aemaise le si'itia ai o le soifua lelei ma le tamaoaiga.
- Na tu'uina atu foi le vaegatupe i le Ofisa mo le Atinaega o Pisinisi Laiti a Samoa, mo nonogatupe fesoasoani mo pisinisi laiti, e tusa ma le \$3 miliona tālā, ma ua fa'amauina ai le 269 o pisinisi laiti na maua lea fesoasoani. Na tu'uina atu foi le \$13 miliona tālā i le Faletupe mo Atinae a Samoa, mo nonogatupe fesoasoani mo pisinisi o lo'o auina atu oloa i fafo, pisinisi gaosi oloa, pisinisi tau fa'atoaga tetele, ma atinae tau tagata tafafao maimoa mai fafo. E 30 pisinisi ua fa'amatuu atu iai lea fesoasoani.

O le Taiala Autū Lua (2): Fa'alauteleina o le Tamāoaiga ma Gafataulimaina

- Na fa'amauina le tulaga lelei pea o le Tamaoaiga, ona o le lagolago o nisi o ta'alogaga fa'avāomalo, lea na talimalō ai Samoa, e pei o le Ta'amilosaga Faa-itulagi o le Pasikeki, mo i latou e I lalo o le 17 tausaga; o le Suegā Siamupini o le Fa'agatama o le Pi'i, fa'apea le Tauvaga Fa'avāomalo mo Si'isi'iga U'amea Mamafa. O ia faagātama na si'itia ai le numera o i latou na asiasi mai, fa'apea le si'itia o

auaunaga fa'a pisinisi, e pei o fale talimalō, o fai pisinisi ta'avale, ma isi pisinisi laiti.

- Na fa'amauina foi le 10 pasene na fa'atupulaia ai le aofaiga o tagata faigaluega i totonu o Samoa, lea na ausia le 28,616 ia Tesema 2025, pe a fa'atusa i le 26,075 na fa'amauina ia Tesema 2024.
- Na fa'atino foi e le Malo nisi o alafua e unaia ai le fa'atupulaia o oloa gaosi i le atunu'u ina ia fa'ateleina ai oloa e auina atu i fafo. E aofia i nei taumafaiga le fa'avaeina o le Fa'alapotopotoga mo Oloa Auina atu i Fafo a Samoa, ma le fausiaina o le Fale fa'apitoa mo le tapenaina o oloa i Atele. O ia galuega, e fesoasoani tele lea i le tapena leleia ma le malu teuina o oloa auina atu i fafo, aua le ausia o tapula'a talafeagai, ina ia fa'alauteleina ai avanoa mo oloa tau fa'atoaga e auina atu i fafo.

### O le Taiala Autū Tolu (3): Saogalēmū ma le Fa'atuatuaaina o Pulega Lelei

- Mo le puipuiga o Nu'u ma Alalafaga, o lo'o fa'atino pea le Fa'alauiloa Fa'ala'uaitetele i le atunu'u atoa mo le "Tete'e Atu i Fuala'au Fa'asāina", ma o le fa'atāua foi lea a le Malo, e galulue so'oso'o tauau ai ma itutino uma o le atunu'u, ina ia taofia ma tafi esea lenei fa'afitauli mai Samoa. O lo'o fa'aaauau foi le polokalame o le 'Pola Puipui' mo le tu'uitiitia o le sauāina o tina ma tamaitai, talu mai Oketopa 2024.
- Na tatalaina foi le Ofisa Fa'apitoa mo Auaunaga tau Puipuiga i le Gataifale i Tuasivi, ia Fepuari 2026, e unaia ai auaunaga tau puipuiga ma le fa'amalosia o tulafono i Savai'i.
- O atinae fa'a tekonoosi i lona fa'aaogaina, fa'apea tulaga tau puipuiga, o lo'o ave pea iai le fa'amuumua, ma o le a fesoasoani tele lea i le faa'atinoga o le Fuafuaga mo Puipuiga Tau Fa'a Tekonoosi 2025/26 - 2030/31 fa'apea le Faiga Faavae mo Fa'amatalaga ma Tekonoosi 2025/26 - 2030/31, e pei ona fa'alauiloa aloaia ia Aperila 2026.
- O le faiga paaga fa'avāomalo ma le atunu'u o Belize lea na aloaia ia Fepuari 2025, fa'apea le Feagaiga tau Femalagaiga i le Vateatea ma

le Malo o Amerika, lea na sainia I le masina o Mati 2026, o loo fa'ailo atu ai le fa'alateleina pea o faiga paaga lelei a le tatou Malo ma atunu'u tetele o le lalolagi.

- O lo'o fa'aauau foi ona mulimulitaia e le Malo ia le fa'atinoga o galuega e tusa ma le fa'agasologa manino ma pulega lelei, ma o le a fa'amalosia atili i le fa'atinoga o le Faiga Fa'avae ma Fuafuaga Fa'ataatitia a le Atunuu e Tetee atu ai i Faiga Fa'aālatua. O lea faiga fa'avae o le a fausia ai alafua mo su'esu'ega e foia ai ni fa'aseā ogaoga e ono tu'uina mai agai I auaunaga eseese a le Malo.

#### O le Taiala Autū Fa (4): Siosiomaga Malu puipuia ma Suiga o le Tau

- O lo'o fa'aauau pea tatou galuega mo se siosiomaga mautū, e aofia ai le fa'aleleia ma le puipuia o punāvai i fanua e tusa ma le 600 heka (po'o le 1,480 eka), fa'apea fa'atinoga o alafua e tu'uititia ai a'afiaga o le tau, i totonu o Vaega Maoti uma o le Tamaoaiga.
- O Tesema 2025 na fa'alauiloa ai le Lipoti lona tolu (3) a Samoa mo ana Tapula'a e Saofagā ai i le Fa'aitiitia o A'afiaga o le Tau, ma o lo'o fa'amauina ai fuafuaga uma mo le fa'aitiitia o kasa oona o lo'o a'afia ai suiga o le tau, e aofia ai atinae tau malosiaga fa'afouina, fa'apea le tomai e tapena ai nu'u ma alalafaga mo le tali atu I aafiaga o le tau.
- O isi atinae tau malosiaga fa'afouina, o lo'o aofia ai polokalame mo nu'u ma alalafaga o lo'o fa'a faigata ona oo iai le eletise, fa'apea le fa'apipi'iina o molī e ola i lā, i le taulaga o Apia. O le Maketi Fou i Savalalo, lea na tatalaina i le masina o Mati 2026, o lo'o fa'aolaina atoa le fale i le malosiaga mai le lā, ma o se atinae muamua foi lea tau malosiaga fa'afouina mo Fale Tetele a le Malo.
- I le tali atu i a'afiaga o le tulaga fa'aletonu o le eletise, e pei ona molimauina i le tausaga talu ai (2025), o loo fa'atino le fa'amatuuina atu o tau tautupe mo oloa alu I le eletise a pisinisi ma aiga na a'afia, o lo'o fa'aauau foi galuega fa'aleleia i afi eletise, fa'apea le fa'ata'atitia o fuafuaga mo le mata'ituina lelei o ia Aseta tetele.

## O le Taiala Autū Lima (5): Tūlaga i Galuega a le Malo ma Atina'e Tetele

- Ua fausia e Fa'alapotopotoga a le Malo o lo'o nafa ma atinae tetele, ia Fuafuaga Mamao aua le fa'atulagana lelei o Galuega Tetele, ina ia mausalī ma lelei atoatoa, le tu'uina atu o auaunaga moomia a le Malo.
- O isi galuega tetele a le Malo o lo'o fa'aauau, e aofia ai le fa'aleleia o auala tetele ma taligalu, fa'aopopo iai ma auala galue, ma atina'e o uafu, e ala atu i le Polokalame mo Atina'e a Itumalo.
- O le fa'alauiloaina o le Upega Tafailagi mo Fa'amatalaga mo Auaunaga a le Malo, o lo'o unaia ai le fa'aaogaina o auaunaga faatekonolosi e fa'a faigofie ai le tu'uina mai o fa'amatalaga i le mamalu o le atunuu.

### Lau Afioga i le Fofoga Fetalai,

O ia taunu'uga uma, o lo'o atagia ai le galulue fa'atasi o itutino eseese, e aofia ai ma a tatou Paaga mo le Atinae. Ua fausia ai fo'i se fa'avae mausali, aua le tatou folauga mo le lumanai.

## II. VAAIGA TAULAI O LE TAMAOAIGA

### Lau Afioga i le Fofoga Fetalai ma Sui Usufono,

O le tamaoaiga o le lalolagi o lo'o fuafua e ono fa'atupulaia i le 3.1 pasene i le tausaga 2026, ma le 3.2 pasene i le tausaga 2027. O lo'o atagia ai a'afiaga o fe'ese'eseaiga ma taua fa'avāomalo o loo fa'aauau pea, ma o le ā fa'atupulaia ai le lē mautonu i tulaga tau fefa'ataua'iga, tulaga i atina'e tau tupe ma le tamaoaiga. Ona o ia a'afiaga mai mea o lo'o tutupu i le lalolagi, e ono siitia lemū le tamaoaiga mo le itulagi o le Pasefika.

Mo Samoa lava ia, o lo'o fuafua e si'itia le tamaoaiga i le 3.0 pasene mo le Tausaga Fa'aletupe 2026/27, mai le 2.8 pasene o lo'o fuafua mo le Tausaga Fa'aletupe 2025/26, ma o lo'o fua aga'i i le fa'atinoga o atinae

ma galuega fa'amuamua o le Taiala fou mo le Lumana'i Manuia mo Samoa, e ala atu i le galulue fa'atasi fa'a-paaga, ina ia fa'asafua fesoasoani mo le soifuaga lautele, fa'alauteleina o le tamaoaiga, fa'apea le fa'atinoina o atina'e tetele.

### III. FA'AVAE O LE TALA O LE TUPE

#### Lau Afioga I le Fofoga Fetalai ma Sui Usufono,

O le Tala Fa'atatau Autū o le Tupe lenei, o le a amatalia ai le fa'atinoga o le Taiala mo le Lumanai Manuia o Samoa 2026/2027-2030/2031, lea e fuafua le fa'alauiloa i le vaiaso fou.

O lenei Fuafuaga Mamao o loo taula i Taiala Autu e lima (5), ma o lo'o lagolagoina e Vaega Fa'amuamua i lalo o Taiala Autu taitasi nei:

- Taiala Autu 1: Atinaega o le Soifuaga Lautele
- Taiala Autu 2: Tamaoaiga Gafataulimaina
- Taiala Autu 3: Fa'atuatuaina o Pulega Lelei, Fa'amamaluina o Tulafaono, ma le Saogalemu
- Taiala Autu 4: Siosiomaga Malupuipua mai Aafiaga o le Tau
- Taiala Autu 5: Lelei Fa'atulaga Galuega Tetele ma Gafataulimaina Atinae Tetele a le Malo

O le taunuuga o ia Taiala Autu e lima, o lo'o fa'avae i aga tausii o le Aiga Samoa, po'o le Aiga Potopoto, e fa'ataua ai so'otaga ma aga tausili, aemaise le galulue so'oso'o tauau ma le galulue fe'oe'oea'i. O le atinaega o le atunuu e le o se matafaioi na o le Malo, ae o se galuega faifa'atasi ma tagatanuu uma aua le manuia lautele.

O le naunautaiga a le Malo e tauala atu i lenei Tala o le Tupe, ia mausalī ma mautū lo tatou tamaoaiga, e mafai ai ona tali atu i so'o se lamatiaga e ono tupu mai.

O lō tatou lumanai manuia o lo'o i o outou aao ma o matou lima pe a tatou galulue fa'atasi o se atunu'u e tasi, o se nuu e tasi ma se aiga e tasi, e pei ona iai le sini autū o le Tala o le Tupe lenei, ua fa'alauteleina ai le upu AIGA: Ia **“Autasi I (le) Gafataulimaina (o) Atina'e”**

#### IV. TA'IALA O LE TALA O LE TUPE

##### Lau Afioga i le Fofoga Fetalai ma Sui Mamalu,

A o fa'aauau ai le ati'ina'eina ma le fa'amausaliina o le fa'atupulaia o le tamaoaiga, o le aotelega o le Tala o le Tupe ua folasia i le Maota, o lo'o fa'amauina ai le fa'asiliga o tupe alu i loo tupe maua e tusa ma le 3.1% o le tamaoaiga mo le tausaga fa'aletupe fou, 2026/27. O lenei fuafuaga o le a mafai ai ona gafataulimaina atinae fa'aauau, unaia le fa'atupulaia o le tamaoaiga ma fa'atumauina le mautu o fuafuaga tau tupe.

O faiga fa'avae ma polokalame o lenei Tala o le Tupe ua fa'avasegaina i ni Vaega tetele se 6:

##### 1. Tali atu i Aafiaga o le Tau o le Suau'u;

E pei ona silafia le tulaga ma'ale'ale o lo'o feagai ai atunu'u o le lalolagi i aafiaga maualuga o le tau o le suauu, ona o taua fa'a-va-o-malo i Sasae Tutotonu, e lē taumate le oo mai i lafanua o le Pasefika fa'apea Samoa, o nei fa'afitauli.

Ona o lea, ua fa'amaonia e le Malo le Fuafuaga e Tali Atu i Aafiaga o le Suauu fa'apea ma le toe tatalaina o auaunaga a le Ofisa Autu mo Fa'alavelave Fa'afuase'i, ina ia mautinoa le lava o le suauu i Samoa nei a'o iai i lamatiaga o le taugata o le suau'u.

- E \$100 miliona talā ua fa'atatauina e fesoasoani i galuega fa'atino a le Fa'alapotopotoga mo Malosiaga Tau Eletise, ma le Pulega o le Suavai ina ia mautinoa le maua pea o nei auaunaga taua. E aofia ai le vaegatupe fa'aleoleo mo le fa'amalosia o le nofo sauni mo tulaga ogaoga e ono tulai mai.
- Ua siitia foi i le \$2.1 miliona talā vaegatupe fa'atatauina mo le tali atu i fa'alavelave tutupu faafuase'i (NEOC) i lalo o Matagaluega o lo'o taulamua i nei matafaioi. O lo'o mautu foi vaegatupe lē fuafuaina a le Malo e mafai ona fa'aaogaina pe a moomia.
- O le a fa'aauau pea ona tuuina atu le \$5 miliona talā mo Fa'alapotopotoga tau le Eletise ma le Suavai, ina ia mautinoa le fa'asopolia o nei auaunaga i nuu i tua ma i latou o lo'o ma'ale'ale lō latou siosiomaga. O le a fa'atumauina fo'i le tau o le eletise ma le

suavai ina ia tu'uitiitia le a'afiaga o aiga pe a si'itia le tau o le soifuaga.

- E \$44.2 miliona tālā vaegatupe mai Paaga mo Atina'e o lo'o fa'aagaga mo poloketi e fa'atinoina e le Fa'alapotopotoga o le Eletise ma le Matagaluega o Galuega, Felauaiga ma Atina'e Eseese. O nei fesoasoani, fa'atasi ai ma fuafuaga mo le fausiaina o ni nofoaga se tolu, e fa'asao ai le malosiaga fa'afouina mai le la (tasi mo Upolu ma le lua mo Savaii), e mautinoa ai le mautū ma le mausalī o malosiaga fa'aeletise i le atunuu.

## **2. Fa'amalosia o Nu'u ma Alalafaga ma le Puipuiga Lautele**

### **Lau Afioga I le Fofoga Fetalai ma Sui Mamalu,**

O lo'o fa'aauau pea ona ave le fa'amuumua a le Malo i le Poloketi o Atina'e o Itumalo (DDP), ina ia unaia le fausia o atina'e gafataulimaina mo le fa'atupulaia o le tamaoaiga. E aofia ai ma le naunauta'iga e fa'amalosia pulega lelei ina ia mautinoa o alaga'oa o lo'o fa'amatu'uina atu, o le a fua mai ai ni taunu'uga mo'omia ma aogā.

I le Tausaga Fa'aletupe 2026/27, e siitia ai le vaegatupe mo lenei Poloketi I le \$102 miliona tālā, e ogatasi lea ma le fa'amoemoe a le Malo ina ia ausia le \$10 miliona tālā a le Itumalo i le maea ai o tausaga e lima o le Paeaiga Sefulu ma le Valu.

O le naunautaiga o nei fuafuaga, ina ia fa'atino atina'e e patino I vaega moomia I itumalo, e pei o tulaga tau fa'atoaga, atinae o tagata tafafao maimoa mai fafo, fa'atinoina o galuega tetele, siosiomaga, taaloga ma aoga, fa'apea le soifua maloloina o le atunuu. O taunuuga lelei o nei fuafuaga, e atagia ai le fa'atuatuaina e le Malo o Pulega a Nuu ma Alalafaga e fa'atinoina lenei Poloketi.

Ua toe fa'aauauina nei le Polokalame o le Uluai Seleselega e tauala atu i le Matagaluega o Fa'atoaga, ina ia fa'amausali ai le lava o taumafa i totonu o le atunuu ma ia si'itia le gaosia o oloa tau fa'atoaga.

E le gata i lea, e \$4 miliona tālā le vaegatupe ua fa'aagaga mo le fa'atauina o le Va'a mo Su'esu'ega Fa'a-faigafaiva, mo le Matagaluega o Faigafaiva ma Punaoa o le Gataifale. O lenei va'a, o le a fesoasoani i le

mataituina ma le pulea gafataulimaina o su'esu'ega fa'afaigafaiva, ina ia mautinoa le atoataoa lelei o fa'amaumauga mo le fa'asaoina o le gataifale auā se manuia o tupulaga faia'e aemaise o Nu'u ma Alalafaga o lo'o fa'alagolago i le Gataifale.

### **Lau Afioga I le Fofoga Fetalai,**

O lo'o fa'atāuaina fo'i e le Malo le sao o Fa'alapotopotoga Tūma'oti i le tau atiina'eina o le atunuu, e auala atu I a latou galuega fa'apaaga i Nu'u ma Alalafaga, i auunaga tau le soifua maloloina, a'oga, tupulaga talavou, tinā ma tamaita'i, tagata e iai a'afiaga tumau o le soifua ma isi. Ona o lea, ua si'itia ai le fesoasoani a le Malo mo nei Fa'alapotopotoga uma, mai le \$7.7 miliona tālā i le \$10.9 miliona tālā.

Ua si'itia nei le fesoasoani a le Malo mai le \$1 miliona tālā I le \$2 miliona tālā (o se siitaga e 50 pasene), e fa'amatu'u atu mo le Polokalame mo le Fausiaina o Fale mo Aiga Lima Vaivai ina ia mautinoa le iai o ni fale saogalemu ma talafeagai mo aiga e ma'ale'ale le soifuaga.

I le taimi nei, o lo'o laugatasia fa'amanuiaga mo tagata penisiona uma I le \$300 tālā I le masina. Ou te fiafia e fa'ailoa atu le si'itaga o le penisiona mo I latou e 70 tausaga ma luga atu le matutua, mai le \$300 tālā I le \$500 tālā I le masina. E tusa ma le 7,285 le faitau aofa'i o i latou e agava'a i lea suiga fou, ma o le a amata fa'amamaluina i le aso 1 o Iulai, 2026.

### **Lau Afioga i le Fofoga Fetalai,**

O le apelepeleina o fanau laiti mai le amataga, o se tasi lea o fa'amuumua sili a le Malo mo le lumana'I manuia o Samoa, ona o le taua tele o vaitausaga muamua o le soifuaga o le tagata mo le atina'eina o le ola aoaoina ma le soifua maloloina.

E tusa ai ma le Fa'ava'a mo le Tapu'eina o Olaga Amata o le Fanau I Samoa 2024-2034, e \$20 miliona tālā le vaegatupe ua fuafuaina mo le amatalia o le Polokalame Fesoasoani a le Malo mo fanau iti e i le va o le 0 - 35 masina le matutua. O lenei fa'amanuiaga e aofia ai le \$200 tālā mo pepe fou fa'atoa fananau (baby bonus), fa'atasi ai ma le fa'amanuiaga fa'alemasina e \$100 tālā, e amata fa'amamaluina mai I le masina o Iulai 2026, ae fa'atoa fa'amatu'u vaegatupe ia Ianuari 2027.

Ua faia lea tulaga ina ia mae'a tapena teuteuga o le Tulafono o le Fa'alapotopotoga mo le Lumanai Manuia o Samoa, fa'apea suiga moomia o le sisetema, aemaise tapenaga a le Matagaluega mo le Atinaega o Aiga ma Agafeso'ota'i mo fa'amaumauga o fanau iti. O lenei fa'amanuiaga mo fanau iti (Child Wellbeing Benefit) ua atoa iai le fesoasoani a le Malo mo le puipuiga o le soifuaga atoa o le tagata, o se polokalame fa'amaite o le Taiala mo le Lumanai Manuia o Samoa 2026/2027 - 2030/2031.

### **3. Fa'amuumua o Auaunaga Lelei tau Soifua Maloloina, A'oa'oga ma le Fa'aagava'aina o Tagata mo le Lumanai**

#### **Lau afioga I le Fofoga Fetalai,**

I le fa'amalosia o auaunaga tau soifua maloloina mo tagatanuu uma o Samoa, ua ave ai le fa'amuumua a le Malo i le auina mai o fualaau ma vailaau moomia fa'apea le fa'aleleia o auaunaga ma le aufaigaluega.

Ua siitia vaegatupe fuafuaina mo vailaau ma fualaau mai le \$14 miliona tālā i le \$21.5 miliona tālā, fa'atasi ai ma le totoigiina o aitalafu tu'ua a le Matagaluega o Soifua Maloloina.

Ua fa'aopoopoina fo'i vaegatupe fa'aagaga mo le toe fa'aleleia ma le tausia lelei o falema'i uma, e aofia ai le suia o aseta e pei o moega ma masini 'ea mālūlū.

I lalo o lenei Tala o le Tupe, o lo'o tu'uina atu pea le \$12 miliona tālā mo le auina atu o gasegase i atunuu i fafo, e le'o mafai ona togafitia i Samoa nei, e ala atu i le Polokalame mo le Auina atu o Gasegase i Atunuu I fafo (Overseas Medical Treatment Scheme). O lo'o fa'aauuina foi le lagolago a le Malo mo i latou ua fa'au'uina mai a'oa'oga fa'a-Soifua maloloina, ma ua fa'aagaga ai vaegatupe e \$1.63miliona tālā ina ia fa'amalosia pea agavaa ma le lelei o nei auaunaga. O lo'o fesoasoani mai fo'i a tatou Paaga o Atina'e i le ofoina mai o foma'i fa'apitoa mo le atoatoa o auunaga e tuuina atu.

#### **Lau Afioga i le Fofoga Fetalai,**

O le malosiaga o se atunu'u e atagia i avanoa e ofoina atu i fanau mo le ola a'otauina mo le poto salalau. Ona o lea, o lo'o fa'aauu pea ona

fa'amuamua e le Malo avanoa tutusa mo a'oa'oga mo tagata uma, ma fa'alauteleina mataupu tau aoaoga i tulaga uma.

E \$18 miliona tālā le vaegatupe ua fa'aagaga e le Malo mo le lagolagoina o le 320 aoga e aofia ai aoga amata, aoga tulagalua, Kolisi ma aoga maualuluga. O lenei fa'amuamua o le a fa'amautinoa ai le fa'aauauina pea o le tuuina atu o aoaoga ma auaunaga lelei mo fanau aoga uma o le atunuu.

Ua iai foi le fesoasoani a le Malo i lona aofaiga e ta'i \$100,000 tālā mo le Aoga Fia Malamalama ma le Loto Taumafai, ina ia mautinoa avanoa tutusa mo a'oga sauo'o ma le amanaia o tagata uma.

E \$1.5 miliona tālā vaegatupe o le a fa'amatu'u atu i fa'alapotopotoga o lo'o ofoina atu Auaunaga mo A'oa'oga Fa'aauau (PSET Providers), e fa'alauteleina ai tomai ma agavaa. O lenei vaegatupe o le a lagolagoina ai aoaoga matata eseese, e tusa ai ma Faiga Fa'avae a le Fa'alapotopotoga o Tusipasi Tualoa a Samoa.

#### **Lau Afioga i le Fofoga Fetalai,**

E \$13 miliona tālā vaegatupe ua fa'aagaga mo Polokalame fa'a-sikolasipi a le Mālō i totonu o Samoa ma atunu'u i fafo, mo fa'ailoga tikeri muamua e aofia ai ma avanoa fa'a-sikolasipi mo tagata faigaluega.

E le gata i lea, o fesoasoani tau tupe mo Fa'alapotopotoga o Tagata e iai Agava'a Fa'apitoa (Professional Bodies) e tusa lea ma le \$200,000 tālā, \$250,000 tālā ua fa'aagaga mo a'oa'oga fa'aaperenetisi ma le \$80,000 tālā mo Asosi o Tagata Faigaluega.

O nei fuafuaga fa'ata'atitia, o lo'o atagia mai ai taumafaiga a le Malo, ina ia fa'aa'upegaina o tatou tagata i tomai ma agava'a, e fesoasoani ai i le atina'eina o le atunu'u, fa'apea le fausiaina o se Samoa e sili atu ona malosi ma mautu.

#### **4. Fa'amalosia Pulega Lelei, Fa'amasinoga Tonu ma le Fa'amaoni o Vaega Tau i Auaunaga a le Malo**

O Pulega mausali ma auaunaga lelei e tāua mo le ausiaina o le gafataulimaina o atina'e o se atunu'u. O le Tala o le Tupe 2026/27, o lo'o

fa'aauauina pea ona fa'atupeina nei taumafaiga e fa'amalosia ai pulega lelei, fa'aleleia o auaunaga a le Malo, ma avanoa tutusa i fesoasoani tau tulafono mo tagata uma.

E tusa ai ma le Fuafuaga mo le Si'itia o Tomai ma Agava'a o Tagata Faigaluega Uma 2025/26 - 2039/40, o le a fa'atinoina e le Malo ni auala e fa'aleleia ma siitia ai le tomai ma agavaa o tagata faigaluega uma auaunaga tausili.

O le Tala Fa'atatau Autu o Tupe 2026/27, o le a fa'avaeina ai le Matagaluega o Faigafaiva ma Punaoa o le Gataifale, Pulega o le Polokalame mo le Atinae o Itumalo ma le Matagaluega mo le Atina'ega o Aiga ma Agafesoota'i.

O nei suiga, o loo atagia ai fetuunaiga a le Malo ina ia mautinoa le sili atu ona lelei le tu'uina atu o auaunaga mo tagata uma.

### **Lau Afioga i le Fofoga Fetalai,**

O le amiotonu ma le fa'amaoni o lo'o avea pea ma poutū mo Pulega Lelei, o lea ua fa'amaonia ai e le Kapeneta le Taiala mo le Suesueina o Fualaa Fa'asaina mo le auaunaga a le Malo 2025. E atagia ai le fa'amamafa ma le fa'amuamua a le Malo i le usitaia o tulaga tausili. O lenei fuafuaga o le a fa'asolo lona fa'atinoina i Vaega o Auaunaga a le Malo, ina ia fa'amalosia ai le pulea lelei ma le fa'atuatua o auaunaga.

E le gata i lea, i lalo o le taitaiga a le Komisi o Tagata Faigaluega a le Malo, o le a unaia le fa'atinoina o le Faiga Fa'avae ma Fuafuaga Fa'ataatitia a le Atunuu e Tetee atu ai i Faiga Fa'aālatua, ina ia fa'amalosia ai amioga tatau ma le amiotonu i vaega uma a le Malo.

O le a fa'alauteleina fesoasoani e agavaa ai tagatanuu mo auaunaga fa'aloia (legal aid) i le Fa'amasinoga e tusa ai ma le toe iloilo o le faiga fa'avae, ma ua fa'aagaga ai le \$600,000 tālā.

E \$4 miliona tālā vaegatupe fa'aagaga mo le vaega muamua o le Fausiaina o le Fale Fa'amasino ma Fale e fa'amautu ai Fa'amasino i Savaii. O le fa'amoemoe a le Malo ina ia fa'afaigofie atili auaunaga tau fa'amasinoga mo Savaii, ma fa'aititia ai le femalagaai i taimi o taualumaga o Fa'amasinoga.

E ala i nei faiga fa'avae, o le a fa'aauau pea ona fa'amalosia e le Malo tulaga maualuga mo le amiotonu, ma siitia le fa'aleleia o auaunaga lautele, e aofia ai ma auaunaga tau i fa'amasinoga mo Samoa.

## **5. Lagolagoina o le Fa'atupulaia o le Vaega Ma'oti tau Pisinisi ma le Fa'alauteleina o Atiina'e o le Tamaoaiga.**

### **Lau Afioga i le Fofoga Fetalai,**

O le lagolagoina ma unaia o atina'e tau pisinisi I totonu o Samoa, o le a fa'atupulaia ai avanoa faigaluga ma le mau'a o le tamaoaiga. O le fa'alauteleina o avanoa mo pisinisi tau Tagata tafafao maimoa mai fafo ma Fa'atoaga, o lo'o avea ma vaega fa'amuumua o le Tala o le Tupe 2026/27.

O le a siitia le vaegatupe mo Atina'e o Pisinisi (Entrepreneurship Facility) o lo'o fa'agaioina e le Fa'alapotopotoga o Pisinisi Laiti (Samoa Business Hub) mai i le \$3 miliona tālā I le \$5 miliona tālā.

E fa'apea foi le fesoasoani mo nonogatupe e māmā aiaiga mo pisinisi laiti ma feololo o lo'o fa'asafua atu e le Faletupe o Atiina'e a Samoa. O lea ua siitia mai I le \$10 miliona tālā I le \$15 miliona tālā.

Ua siitia fo'i le fesoasoani a le Malo mai le \$3 miliona tālā I le \$5 miliona tālā mo le au fai pisinisi o lo'o auina atu oloa I fafo, e pei ona fa'amatuuina atu fo'i e le Faletupe o Atiina'e o Samoa.

O nei fuafuaga mo fesoasoani tautupe, ua manatu le Malo e avea ma auala e fausia ai se siosiomaga e mafai ai ona fa'alauteleina pisinisi, ma fesoasoani malosia i le atinaega o le tamaoaiga o Samoa.

### **Lau Afioga I le Fofoga Fetalai,**

Ina ia fa'aauau pea le lagolago a le Malo I le atina'eina o fa'atoaga, ua fuafuaina ai le vaegatupe e \$1 miliona tālā I lalo o le Matagaluga o Fa'atoaga, mo le fausiaina o le Fale e teumaluina ai masini ma fa'atino ai galuga fa'aleleia, ina mautinoa ai le umi ona fa'aaogaina.

## **6. Fa'amalosia ma Fa'alauiloa le Aganu'u, Ta'aloga ma Fa'asinomaga**

### **Lau Afioga i le Fofoga Fetalai,**

O le Tausaga Fa'aletupe 2026/27, o le a talimalo ai Samoa i Fonotaga Fa'aitulagi ma Fa'a-va-o-Malo, i lona tulaga fa'ata'ita'ifono, ma o se avanoa taua lea e fa'alauiloa ai le tatou aganu'u, fa'asinomaga aemaise aga talimalo.

E tusa ma le \$1,018,100 tālā le vaegatupe ua fa'aagaga mo tapenaga a Samoa a'o alo atu ai i ana taligamalo mo le;

1. Fonotaga a le Atoa o Samoa;
2. Fonotaga o le Komiti Fa'atonu o le Iunivesite o le Pasefika i Saute;
3. Fonotaga a le Komiti Fa'asaienisi a le Komisi o Faigafaiva i Sisifo ma le Totonugalemu o le Pasefika;
4. Fonotaga lona lima (5) a Minisita o Tupulaga Talavou a le Pasefika; fa'apea ma le
5. Aoaoga Fa'a-Itulagi mo Tulaga Lamatia tau Tupe.

O nei fonotaga o le a fesoasoani i le au faipisinisi ma le unaia o le tamaoaiga.

Ua fuafuaina fo'i vaegatupe e \$2.5 miliona tālā mo tapenaga o le fa'amanatuina o le 65 Tausaga o le Tutoatasi o Samoa ia luni 2027, ae \$200,000 talā mo le Teuila ia Setema 2026. O nei Aso Fa'amanatu, e taua mo le fa'alauiloaina o measina a Samoa ma lana aganu'u, ma o se vaega e taula'i i tulaga tau atina'e mo Tagata tafafao maimoa mai fafo.

### **Lau Afioga I le Fofoga Fetalai,**

Ua fa'amauiaina foi le fa'atupulaia o le sao taua o taaloga, I le atina'eina o tupulaga talavou, aemaise le siitia o le soifua laulelei fa'apea le tamaoaiga o Samoa.

E le natia le aga'i I luga o fa'afitauli o lo'o feagai ma tupulaga talavou, e aofia ai le utiuti o avanoa faigaluega, o le tagofia ma le tua i fualaau fa'asāina, o sauaga, ma le taumamao ma o latou fa'asinomaga. O le ala lea o le ave pea o le fa'amua I le unaia o avanoa e maua ai

galuega aemaise o le fa’aaogaina o tomai ma taleni o tupulaga talavou, aua se tamaoaiga manuia.

O lenei tulaga o loo atagia ai le fa’avaeina o le Matagaluega o Taaloga ma Alagaoa mo le Fiafiaga o Tagata fa’apea foi le amanaia o se Vaega Maoti I totonu o le Taiala mo le Lumanai Manuia o Samoa.

Ma o lo’o fa’atumauina pea le Vaegatupe o Atinae mo Taaloga I le \$6 miliona tālā mo le Tausaga Fa’aletupe 2026/27, e lagolagoina ai Asosi o Ta’aloga eseese, Ta’aloga Faitaulia I totonu o Nuū ma Afioaga, Ta’aloga Fa’a-va-o-malo fa’apea Ta’aloga o lo’o talimalo ai Samoa ma tuu maualuga ai le tulaga o Samoa i le lalolagi.

## V. OTOOTOGA O LE TALA O LE TUPE

### Lau Afioaga i le Fofoga Fetalai ma Sui Usufono,

O le a ou ‘otoina atu loa vaega uma o le Tala Fa’atatau Autū o le Tupe mo le Tausaga Fa’aletupe 2026/27:

<b>Tupe Maua</b>		\$	1,284,710,935
Tupe Maua Masani	\$	1,008,034,219	
Tupe Faameaalofa mai Fafo	\$	276,676,715	
<b>Tupe alu I le Taimi nei</b>		\$	1,500,580,288
Tupe Alu Faale-Tulafono	\$	161,885,790	
Polokalame o Tupe Alu	\$	1,090,053,981	
Tupe Faaalu lē Fuafuaina	\$	32,701,619	
Tupe alu mo Atinae	\$	215,938,897	
<b>Faasiliga o Tupe Alu i Tupe Maua</b>		-\$	215,869,354
Faatupeina e:			
Faaunegatupe māmā e faatupe ai Galuega Tau Atina'e	\$	41,493,776	
Tupe Fesoasoani Tu'u sa'o mo le Tala ile Tupe	\$	59,980,791	
<b>Fesuaiga o Tinoitupe a le Malo</b>		-\$	114,394,787

O le aotelega o le Tala o le Tupe mo le Tausaga Fa’aletupe 2026/27, o lo’o fa’amauina ai se fa’asiliga o tupe alu i tupe maua e \$215.9 miliona tālā, e tusa lea ma le 3.1 pasene o le tamaoaiga, i lalo o le Auivi o Fa’amaumauga o Tupe a le Malo po’o le GFS.

## **VI. FA'AVAE O TUPE MAUA**

### **Lau Afioga i le Fofoga Fetalai,**

O lenei Tala o le Tupe o lo'o atagia ai le naunautaiga fa'aauau a le Malo i le fa'atumauina o le pasene mo le lafoga fa'aopoopo i luga o oloa ma auaunaga (VAGST) ma lafoga i luga o tupe maua (Income Tax).

E pei ona silafia, o Tupe Maua masani, o lo'o fa'alagolago iai le fa'atupeina o galuega fa'atino ma atiina'e a le Malo, ma e tumau ai le fa'amamamua i le unaia o lona aoina e tauala atu i le fa'amalosia o le mulimulitaia o taiala ma faiga fa'avae tau lafoga e pei ona mataitu e le Matagaluega o Tupe Maua ma le Matagaluega o Tiute.

Ua fa'amauina le siitia maualuga o Tupe Maua mai Lafoga i le 17 pasene mo le tausaga fa'aletupe 2026/27, e aofia ai ma le 3 pasene fa'aopoopo i luga o lafoga mo tapa'a lea e amata fa'amamamua i le aso 1 Ianuari 2027. O lo'o iai foi le naunautaiga, o le a siitia le lafoga o tupe maua mai totogi fuapauina o auaunaga a le Malo i le 4 pasene, i totonu o le tausaga fa'aletupe.

## **VII. GALUEGA FA'ATINO MA ATI'INA'E O LO'O AVE IAI LE FA'AMAMAMUA**

### **Lau Afioga i le Fofoga Fetalai ma Sui Mamalu o le Palemene,**

O le aotelega o tupe fa'aalu ua fa'atatauina mo le tausaga fa'aletupe 2026/27, e tusa lea ma le \$1.5 piona talā. O lenei aofaiga o lo'o aofia ai ma tupe fa'atatauina mo poloketi tau atiina'e e fa'atupeina e Pa'aga mo Atiinae. O lo'o atagia ai se siitaga e tusa ma le 21 pasene pe a fa'atusa atu i le tausaga fa'aletupe ua mavae.

### **Lau Afioga i le Fofoga Fetalai,**

O le a ou 'auiliiliina atu loa vaegatupe ua fa'atatauina mo Matagaluega ma Fa'alapotopotoga ta'itasi, mo le tausaga fa'aletupe 2026/2027:

1. **Matagaluega o Fa'atoaga - \$20,737,160**
  - Galuega Fa'atino a Matagaluega - \$12,777,911
  - Galuega Fa'atino e Tuuina atu i isi Vaega - \$5,373,081, ma e aofia ai le,
    - Fa'alapotopotoga o Suesuega Fa'asaienisi - \$4,983,081;
    - \$200,000 mo le Sosaiete mo le puipuia o lafu manu;
    - \$150,000 mo le Fa'alapotopotoga o Tina Faipisinisi;
    - \$20,000 mo le Asosi o Faifa'atoaga o Samoa;
    - \$20,000 mo le Asosi o Tamaitai Faifa''atoaga i Samoa;
  - Galuega e Avea ai ma Sui o le Malo - \$2,586,168
  
2. **Matagaluega o Pisinisi, Alamanuia ma Leipa - \$22,341,650**
  - Galuega Faatino a Matagaluega - \$6,073,634
  - Galuega Faatino e Tuuina atu i isi Vaega- \$13,740,122, ma e aofia ai le;
    - Fesoasoani mo le Ofisa o Tagata Tafafao mai Fafo - \$12,500,122
    - \$450,000 mo le Fa'alapotopotoga o le Aufaipisinisi Alamanuia o Samoa
    - \$550,000 mo le Fa'alapotopotoga mo le Atiinaega o Pisinisi Laiti;
    - \$100,000 mo le Fa'alapotopotoga o Pisinisi Gaosi Oloa;
    - \$100,000 mo le Asosi o Pisinisi Faletalimalo a Samoa;
    - \$20,000 le Fesoasoani mo le Fa'alapotopotoga a Pisinisi o Salafai;
    - \$20,000 le Fesoasoani mo le Asosi a le 'au fai mamanu a Samoa.
  - Galuega e Avea ai ma Sui o le Malo - \$2,527,894
  
3. **Matagaluega o Fesootaiga ma Fa'amatalaga Fa'atekonolosi - \$11,044,463;**
  - Galuega Fa'atino a Matagaluega - \$4,988,537;
  - Galuega Fa'atino e Tuuina atu i isi Vaega - \$3,003,518; Mo le Ofisa o le Pule Fa'atonu;

- Galuega e Avea ai ma Sui o le Malo - \$3,042,408.
- 4. Matagaluega o A’oga ma Aganuu’u - \$135,407,309;**
- Galuega Fa’atino a Matagaluega - \$87,330,883;
  - Galuega Fa’atino e Tuuina atu i Isi Vaega - \$41,374,502;
    - Iunivesite Aoao o Samoa - \$17,200,000;
    - Pulega o Fa’ailoga ma Tusi Pasi Tauloa o Samoa - \$4,474,502;
    - \$18,000,000 mo le Fesoasoani a le Malo mo Aoga;
    - \$100,000 mo le LotoTaumafai
    - \$100,000 mo le Aoga Fia Malamalama
    - \$1,500,000 mo le Auaunaga mo Aoga Fa’aaau
  - Galuega e Avea ai ma Sui o le Malo - \$6,701,924
    - \$1,500,000 mo Sikolasipi a Faiaoga
- 5. Matagaluega o Ta’aloga ma Alagaoa - \$11,210,482;**
- Galuega Fa’atino a Matagaluega - 4,438,693;
  - Galuega e Avea ai ma Sui o le Malo - \$6,771,789
    - \$6,000,000 mo le Fesoasoani i Atina’e eseese o Ta’aloga
- 6. Matagaluega o Tupe - \$276,257,687;**
- Galuega Fa’atino a Matagaluega - \$21,572,312;
  - Galuega e Avea ai ma Sui o le Malo - \$254,685,375
    - \$100,000,000 mo le Tali atu i Fa’afitauli o le Malosiaga;
    - \$54,084,867 mo le Fa’amanuiaga mo le Au Matutua Penisiona ma Tagata e iai aafiaga tumau o le Soifua;
    - \$20,000,000 mo le Fa’amanuiaga mo Fanau Iti;
    - \$10,000,000 mo le Fa’alapotopotoga mo le Atiina’e o Pisinisi Laiti ma le Faletupe mo le Atiinae o Samoa;
    - \$6,000,000, mo le Fa’alapotopotoga o Fale a le Malo;
    - \$15,000,000 mo le Faletupe o Atiina’e a Samoa;
    - \$200,000 mo le Fa’alapotopotoga mo Komiti Fa’atonu;

**7. Matagaluega o le Va-i-Fafo ma Fefa'atauaiga - \$33,924,278;**

- Galuega Fa'atino a Matagaluega - \$29,557,595;
- Galuega Fa'atino e Tuuina atu i isi Vaega - \$1,484,846 aofia ai le fesoasoani a le Malo i le Pulega o Oloa Auina atu i Fafo a Samoa;
- Galuega e Avea ai ma Sui o le Malo - \$2,881,837

**8. Matagaluega o le Soifua Maloloina - \$183,429,092;**

- Galuega Fa'atino a Matagaluega - \$137,362,457;
- Galuega Fa'atino e Tuuina atu i isi Vaega - \$12,154,897;
  - E aofia ai le fesoasoani a le Malo i le Fa'alapotopotoga Fa'avae Tau Fatugao a Samoa - \$11,704,897;
  - \$100,000 mo le Koluse Mumu;
  - \$100,000 mo le Sosaiete o le Kanesa i Samoa;
  - \$100,000 mo le Goshen Trust;
  - \$100,000 mo le METI;
  - \$50,000 mo le Fa'alapotopotoga mo le Soifuaga Manuia o Aiga;
- Galuega e Avea ai ma Sui o le Malo - \$33,911,738
  - \$12,000,000 mo le Polokalame mo Togafitiga i Atunuu i Fafo

**9. Matagaluega o Fa'amasinoga - \$23,535,929;**

- Galuega Fa'atino a Matagaluega - \$16,911,434;
- Galuega e Avea ai ma Sui o le Malo - \$6,624,495
  - \$4,000,000 mo le Vaega Muamua mo le Fausiaina o le Fale Fa'amasino i Savaii;
  - \$600,000 mo le Fesoasoani mo Auaunaga Fa'aloia;

**10. Matagaluega o Punaoa Fa'alēnatura ma le Siosiomaga - \$22,506,552;**

- Galuega Fa'atino a Matagaluega - \$13,928,258;
- Galuega Fa'atino e Tuuina atu i isi Vaega - \$200,000

- \$50,000 mo le Fa’alapotopotoga a Samoa ma Tokelau mo le toe fa’aaogaina o otaota e gaosia ai oloa;
  - \$50,000 mo le Fa’alapotopotoga a Samoa mo le puleaina ma le toe fa’aaogaina o Otaota Lafoa’i;
  - \$100,000 mo le Asosi o Suavai Tumaoti;
  - Galuega e Avea ai ma Sui o le Malo - \$8,378,294
- 11. Matagaluega o Eleele ma Fua Fanua - \$10,658,457;**
- Galuega Fa’atino a Matagaluega - \$6,816,484;
  - Galuega e Avea ai ma Sui o le Malo - \$3,841,973
- 12. Matagaluega o Leoleo, Falepuipui ma le Ola Toe Fuata’ina- \$65,408,762;**
- Galuega Fa’atino a Matagaluega - \$44,398,899;
  - Galuega Fa’atino e Tuuina atu I Isi Vaega - \$12,986,624 mo le Pulega o Galuega Fa’a-Tineimu i Samoa
  - Galuega e Avea ai ma Sui o le Malo - \$8,023,239.
- 13. Matagaluega a le Palemia ma le Kapeneta - \$14,887,920**
- Galuega Fa’atino a Matagaluega - \$8,251,627;
  - Galuega e Avea ai ma Sui o le Malo - \$6,636,293
    - \$2,500,000 mo le Fa’amanatuina o le Tutoatasi o Samoa
    - \$925,908 mo le Fale Lomitusi a le Malo
- 14. Matagaluega o Tiute - \$10,684,210;**
- Galuega Fa’atino a le Matagaluega - \$9,138,935;
  - Galuega e Avea ai ma Sui o le Malo - \$1,545,275.
- 15. Matagaluega o Tupe Maua - \$10,233,882;**
- Galuega Fa’atino a le Matagaluega - \$6,543,382;
  - Galuega e Avea ai ma Sui o le Malo - \$3,690,500.
- 16. Matagaluega o Atiina’ega o Aiga ma Agafesootai - \$122,902,775;**
- Galuega Fa’atino a le Matagaluega - \$5,960,007;

- Galuega F’aatino e tuuina atu i isi Vaega - \$113,602,624; e aofia ai;
  - \$112,582,624 mo le Pulega o Atina’e mo Itumalo o Samoa;
  - \$300,000 mo le SUNGO;
  - \$200,000 mo le Fesoasoani mo le Toomaga mo e Puapuagatia;
  - \$100,000 mo le Mapuifagalele;
  - \$100,000 mo le Mapuipulotu;
  - \$100,00 mo le SENESE;
  - \$20,000 mo le Fono a Ekalesia Soofatasi;
  - \$20,000 mo le Nuanua o le Alofa;
  - \$20,000 mo le Salvation Army;
  - \$20,000 mo le Asosi o Tagata e po le Vaai;
  - \$20,000 mo le Asosi o Tagata Logonoa;
  - \$20,000 mo le Asosi o Faafafine i Samoa;
  - \$20,000 mo le Toefuataiga o le Tupulaga Talavou;
  - \$20,000 mo le Asosi Faaliliu-upu i le Gagana Fa’itaga a Samoa;
  - \$20,000 mo le Soul Talk;
  - \$20,000 mo le Tofasinasina;
  - \$20,000 mo le Polokalame o Tupulaga ia Keriso.
- Galuega e Avea ai ma Sui o le Malo - \$3,343,144
  - \$2,000,000 mo le Polokalame mo le Fausiaina o Fale mo Tagatanuu Lima Vaivai.

**17. Matagaluega o Galuega, Felauaiga ma Atina’e Tetele - \$37,004,198;**

- Galuega Fa’atino a Matagaluega - \$7,993,121;
- Galuega Fa’atino e Tuuina atu I isi Vaega - \$28,000,007 e aofia ai;
  - \$17,000,007 mo le Pulega Felauaiga i le Laueleele;
  - \$5,000,000 mo le Fa’alapotopotoga Pulega o le Suavai;
  - \$5,000,000 mo le Fa’alapotopotoga o le Malosiaga tau Eletise;

- \$1,000,000 mo Mea Faigaluega tau Saogalemu mo le Pulega o Malaevaalele;
- Galuega e Avea ai ma Sui o le Malo - \$1,011,070.
  - \$200,000 mo le Fa'alauteleina o Vaitafe
- 18. Matagaluega mo Fa'alapotopotoga a le Malo - \$11,204,847;**
  - Galuega Faatino a Matagaluega - \$2,413,816;
  - Galuega e Avea ai ma Sui o Le Malo - \$8,791,031.
- 19. Ofisa o le Loia Sili - \$6,905,338;**
  - Galuega Fa'atino a Matagaluega - \$6,073,637;
  - Galuega e Avea ai ma Sui o le Malo - \$831,701.
- 20. Ofisa o le Pule ma le Su'etusi Sili - \$4,445,775;**
  - Galuega Fa'atino a Ofisa - \$3,789,373;
  - Galuega e Avea ai ma Sui o le Malo - \$656,402.
- 21. Ofisa o le Komesina o Faigaplota - \$3,669,119;**
  - Galuega Fa'atino a Ofisa - \$3,431,369;
  - Galuega e Avea ai ma Sui o le Malo - \$237,750.
- 22. Ofisa o le Failautusi o le Fono Aoao Faitulafono - \$10,221,370;**
  - Galuega Fa'atino a Ofisa - \$8,682,536;
  - Galuega e Avea ai ma Sui o le Malo - \$1,538,834.
- 23. Komesina o Sulufaiga - \$1,878,578;**
  - Galuega Fa'atino a Ofisa - \$1,605,232;
  - Galuega e Avea ai ma Sui o le Malo - \$273,346.
- 24. Komisi o Tagata Faigaluega a le Malo - \$20,005,765;**
  - Galuega Fa'atino a Ofisa - \$5,431,763;
  - Galuega e Avea ai ma Sui o le Malo -\$14,574,002
    - \$13,000,000 mo Polokalame o Sikolasipi a le Malo;
    - \$200,000 mo Asosi o Tagata Faigaluega

- 25. Ofisa o Fuainumera Fa'amauina - \$9,275,008;**
- Galuega Fa'atino a Ofisa - \$5,529,328;
  - Galuega e Avea ai ma Sui o le Malo - \$3,745,680.
    - \$2,500,000 mo le Tusigaigoa o le Faitauaofai o Tagata
    - \$200,000 mo le Fuafuaga mo le Resitala Tele o Tagatanuu o Samoa
- 26. Komisi o le Toe Fuataiga o Tulafono - \$1,575,522**
- Galuega Fa'atino a le Komisi - \$1,265,035;
  - Galuega e Avea ai ma Sui o le Malo - \$310,487.
- 27. Matagaluega o Faigafaiva ma Punaoa o le Gataifale - \$8,694,853**
- Galuega Fa'atino a Matagaluega - \$3,225,521
    - Galuega Fa'atino e Tuuina atu i isi Vaega - \$20,000 mo le Asosi o Tautai Samoa;
  - Galuega e Avea ai ma Sui o le Malo - \$5,449,332

## **VIII. TUPE FA'AALU LĒ FUAFUAINA**

**Lau Afioga I le Fofoga Fetalai,**

E \$32.7 miliona talā le vaegatupe ua fa'aleoleo mo ni vaega e le'i fuafuaina, e tusa lea ma le 3 pasese o polokalame o tupe alu.

## **IX. TUPE ALU I ATIINA'E**

**Lau Afioga I le Fofoga Fetalai,**

O loo fa'amoemoe e siitia vaegatupe tuuina mai e Paaga mo le Atina'e i le \$215.9 miliona tala e lagolago ai vaega fa'amuumua a le Malo.

O lenei siitaga o loo atagia ai vaegatupe mo le vaega maoti o le malosiaga, e fesoasoani lea i le tali atu i fa'afitauli tau malosiaga e aofia ai ma le fa'amuumua i le malosiaga fa'afouina. O lo'o aofia ai foi ma le;

- Polokalame mo le Siitia o tapenapenaga e tali atu i suiga o le tau ma fa'alavelave fa'afuasei i le itulagi a le Pasefika (PREPARE),
- Poloketi mo Atiina'e o le Vaega Maoti o Tupe i Samoa;
- Poloketi mo le Malu Puipuia o Fesootaiga Fa'atekonolosi;
- Poloketi mo le Fausiaina o le Fa'atanoa Vai i Alaoa;
- Fesoasoani mo le Atiinae Itulagi o Vaalele Sivili ma Auala Tetele (SARIP);
- Poloketi mo le Fa'aleleia o le Uafu Fa'a-va-o-Malo a Samoa (ESSSAP); ma le
- Polokalame mo le Fa'amalosia o Vaega Tau Tupe o Samoa (FIRST).

E le gata i lea, o lo'o tapena fo'i le;

- Poloketi mo le toe fa'aleleia o auunaga ma puipuiga fa'aeletise (GridSECURE);
- Polokalame mo le fa'amalosia o auunaga tau soifua manuia o tagata lautele a le Vaega Maoti o Soifua Maloloina;
- Fesoasoani mo le Fausiaina o Polokalame mo Aoaoga ma Tagata Tafafao maimoa mai fafo;
- Poloketi mo le Fausiaina o Auala Tetele ma Auala Laupapa;
- Poloketi mo le Siitia o Fesoasoani Tau Tupe mo Pisinisi; ma le
- Siitia o le fesoasoani tau tupe mo le tali atu i suiga o le tau.

**Lau afioga i le Fofoga Fetalai,**

O le \$26 miliona tālā o vaegatupe fa'ameaalofa mai Paaga mo le Atiina'e, ua patino lea i le fa'atupeina o galuega a vaega maoti tau soifua maloloina, a'oa'oga, fa'atoaga ma faigafaiva, e tusa ai ma le fa'amuamua a le Malo i le unaia o taunuuga fuafuaina ma le gafataulimaina o le tamaoaiga o Samoa.

E tusa ma le \$61 miliona tālā fesoasoani tuusaoina atu i Fa'alapotopotoga tumaoti, alalafaga ma afioaga ta'itasi, aua le fa'atinoga o atiinae laiti fa'amuamua a nuu ma alalafaga.

**Lau Afioga i le Fofoga Fetalai,**

O le mausalī o le fa'agaioiina o tulaga tau tupe a le atunuu i tausaga ua tuana'i, ua fa'aitiitia ai le tulaga lamatia o le gafatia e Samoa ona totogi ana nonogatupe, mai i le tulaga maualuga (high risk) i le tulaga feololo (moderate risk). Na ausia lea matātī'a i le tausaga 2024 ona o le lelei o le puleaina o tupe alu, fuafuaga o tupe totogi mo nonogatupe, fa'apea le

fa'atinoina o suiga talafeagai i faiga fa'avae mo le puleaina o tupe a le Malo.

O luma atu o le tausaga 2025, sa fa'amatuuina mai e le Faletupe o le Lalolagi (World Bank) ma le Faletupe o Atiinae o Asia (Asian Development Bank) fesoasoani fa'ameaalofa i lona atoaga. Peita'i, e tusa ai ma le maualuga o le fa'agaioiina o tulaga tau tupe e pei ona taua i luga, ua suia ai nei aiaiga o nei fesoasoani i le 50% fa'ameaalofa ma le 50% fa'aunegatupe e māmā tului.

O lenei fesuiaiga ua atagia ai le fa'atuatuaina o Samoa e ana Paaga mo le Atiina'e, i le pulea lelei o ana aitalafu ma fa'apea ona maua ai avanoa e fa'atupe ai atiinae fa'amuamua. E \$41.5 miliona tālā le aofaiga o fa'aunegatupe e mama tului ua mafai ona tuuina mai e fesoasoani i le fa'atupeina o le Tala Fa'atatau Autu o Tupe.

### **Lau Afioga i le Fofoga Fetalai,**

O le a fa'aauau pea ona feutaga'i le Malo ma ana Paaga mo le Atiina'e aua le fa'amautuina o fesoasoani fou e ono tuuina mai, e fa'atupeina ai atiina'e fa'amuamua a le Malo. E maualuga le fa'amoemoe, o nei feutana'iga o le a mafai foi ona fa'amausali ai le fa'atuatuaina o tatou faiga fa'avae ma pulega lelei, ma siitia ai tulaga manino ma le tali atu i fa'atinoga o fuafuaga mo faiga fa'apaaga.

## **X. UPU FA'AI'U**

### **Lau Afioga i le Fofoga Fetalai,**

E tumau pea le naunautaiga ina ia fa'aaoga tatau alagāoa a le Malo, ma ia mautinoa le fa'asopolia o le atunuu i fa'amanuiaga o atiinae. O le alafua sili o lenei Tala o le Tupe, e le o i fuainumera ua fa'ailoa atu i le asō, ae o le taunuuga o galuega ofoina atu mo o tatou tagata, e le gata i totonu o nuu ma alalafaga, aoga, maota gasegase, pisinisi fa'apea le lautele o le atunuu.

O lea ua fa'atulaga ai le lufilufiina o lenei Tala o le Tupe mo:

Se tinā matua o lo'o tausi to'atasi fanau a lana fanau,

O se tinā o lo'o tauave lē leoa faigata o le soifuaga,

O se tāmā o lo'o taumate pe fa'apefea ona fuafua lana fa'asoia se'ia aulia

le isi vaiaso,  
O se talavou o lo'o tau saili le avanoa mo sona lumana'i manuia,  
Po se tama po'o se teine iti o lo'o momo'o i le saogalemu, ma le  
apelepeleina.

**Lau Afioga i le Fofoga Fetalai ma Sui Mamalu o le Palemene,**

E pei ona ou fa'ailo i le taimi ua sola, ua tatou iai i le vaitau o le lē  
mautonu ona o lu'itau tetele i lo tatou tamaoaiga aemaise o tatou aiga, o  
lea e ao ai ona tatou **Autasi Ile Gafataulimaina o Atinae**, aua se lumana'i  
manuia o Samoa.

**Lau Afioga i le Fofoga Fetalai,**

Ou te tuuina atu le Tala Fa'atatau Autu o le Tupe 2026/27 i le  
laulauafono a le Palemene o Samoa, mo la outou fa'atofalaiga.

Ia Fa'amanuia mai le Atua i le fa'amanatuina o le 64 tausaga o lou  
Tutoatasi, Samoa.

**Soifua ma ia Manuia.**